

# La televisiun da Bulsaun rapporta

(gsc) Dacurt è delegadas e delegads da 22 gasettas edidas da gruppas etnicas europeicas sa rinnads a Bulsaun, chapitala dal Tirol dal sid, sut l'egida da *Toni Ebner*, schefredactor da «Dolomiten» e parsura da la «MIDAS - European Association of Daily Newspapers in Minority and Regional Languages» (v. *La Quotidiana* dals 27 da matg 2011). Cun lezza occasiun ha il studio RAI da la televisiun germanofona a Bulsaun registrà material per in'emissiun davart la MIDAS e sias multifaras commembras, da la Catalugna a la Finlanda e Transilvania. Tgi che retschaiva ils programs da quel studio, per exempel en la Val Müstair, po vesair l'emissiun «Minet Spezial MIDAS» mesemna, ils 29 da zercladur, a las 20.20. Il parsura da la MIDAS e ses secretari general *Günther Rautz* ([g.rautz@eurac.edu](mailto:g.rautz@eurac.edu)) preschentan lur organisaziun e descrivan la situaziun da differentas minoritads linguisticas. Ins vegn pia a savair dapli davart «Dolomiten» ([www.dolomiten.it](http://www.dolomiten.it)), gasetta fundada 1882 sco «Der Tiroler», cur ch'il Tirol entir fascheva part da l'imperi austriac, e che cumpara dapi 1945 senz'interrupziun sco «Dolomiten». Adina puspè publitgesch'la era contribuziuns ladinas; mo per ladin è «La Usc di Ladins» ([uscdiladins@libero.it](mailto:uscdiladins@libero.it)), «foliet edemal dla Union generela di Ladins dla Dolomites» per las tschintg valladas Gherdëina, Badia, Fascia, Fodom ed Anpezo (sic!). Durant l'emissiun preschenta *Edita Slezakova* «új szó» («pled nov»), gasetta da la gruppa etnica ungaraisa en Slovachia ([www.ujszo.com](http://www.ujszo.com)) publitgada a Bratislava/Pozsony dapi 1948 e democratisada 1990. Lezza minoritad dumbra var 500 000 olmas; ella è naschida sco tala 1920, cur ch'ins ha fixà il cunfin tranter l'Ungharia e la Tschecoslovachia, gist sco la gruppa germanofona dal Tirol dal sid, attribuida 1919 a l'Italia. La redacziun da «Dolomiten» ha dal rest survegnì 2009 in premi dal comité «Báthory István» (Cluj-Napoca/Kolozsvár) per la nova fundaziun d'in'universitad da linguatg ungarais en Transilvania.